

山西司

一起爲特叅虧那等事會看得托克托城協理通判槐唐阿虧那倉穀一案先據山西巡撫鄂弼疏稱原叅槐唐阿虧空各項倉穀共一萬三千五百三十石零緣該協有安仁興義遵道三里中下地二千三百餘頃自乾隆二年招民認種連歲歉收承種各戶多非土著無力完糧遂各棄地潛逃移籍查追十無一完槐唐阿于十九年十二月到任接徵十四年起至十九年止民

欠草折銀共一千五百一十一兩零米二千六百六十石零又二十年起至二十二年止民欠草折銀共一千五十八兩零又二十年民欠米八百九十石零嗣因綏遠城同知差催緊急槐唐阿卽於二十一二兩年先後那動倉貯備借穀四千二百八十三石零糴銀二千五百七十九兩零作爲十四年起至二十二年止民欠草折銀兩墊解完項又先後那動倉貯備借穀五千九百一十八石零碾米三千五百五十石零作

爲十四年起至二十年止民欠米石墊解完項
又因托協里民有二十二十一二等年借領倉
穀一千三百二十九石徵比無完槐唐阿恐干
叅處又將倉貯備借穀一千三百二十九石那
動抵補均於各該年地丁倉糧奏銷冊內捏報
全完又槐唐阿自十九年冬間到任後接收前
協格圖肯移交倉穀九萬六百八十石零續於二
十年自正月起至八月止新收穀三萬四千三
百九十一石零共穀一十二萬五千石俱用舊

存小斛量收嗣因歸化城奉文辦運軍需米石
軍營較量每石少米一升六合經前撫臣恒文
將舊斛解部較驗每石實小一升六合當將小
斛銷燬另製大斛發用以致舊收穀石共虧折
穀二千石槐唐阿復將倉貯備借穀那動二千
石以補虧折之項以上共那動穀一萬三千五
百三十石零嗣經臣於乾隆二十四年十一月
內題明將該協倉貯備借穀二萬石撥運保德
河曲二州縣賑濟被災貧民於二十五年三月

內催令該協運交槐唐阿無項可運遂將舊存
倉貯穀那動二千五百一十石零同二十四五
兩年收回二十三年分借給土默特官兵人等
穀五千七百八十二石零二十四年收回二十
三年分借給善岱和林格爾各協里民穀一千
二百三十四石零二十五年奉撥保德州未交
賑濟折米穀二千八百石二十五年詳准借給
托協里民粘種未領穀一千二百三石零以上
共穀一萬三千五百三十石零抵作原那備借

倉穀運交保德河曲二州縣查收賑濟在案經
臣研鞫該叅員堅供實係因各年民欠銀米及
借領倉穀不能完納私那備借穀石糴銀碾米
分年墊解捏報全完並那補斛面虧折穀石復
將舊存倉貯前項五欸穀石抵作備借穀數運
赴保河等處賑濟屬實供認不諱隨查該協歷
年地丁倉糧各項奏銷冊卷所開完欠銀糧各
細數均與所供相符其所供銷燬舊存小斛另
製大斛發用之處亦有各部案據可稽並據委

員寧武府知府薄岱查明該叅員那動倉穀實
係墊完民欠並無假捏侵漁入已情弊嚴加究
詰委無遁情查例載凡審那移之案于定案日
查明叅後完過若干准予開除以現在未完之
數定擬又例載州縣衛所虧空錢糧如果民欠
未完捏報全完其捏報官員應照虛出通關硃
鈔律計所虛出之數併贓皆以監守自盜論又
例載監守自盜倉庫錢糧在一千兩以上者擬
斬監候又例載州縣虧空倉穀以穀一石照銀

五錢定罪又例載那移虧空五千兩以下者仍照律擬雜犯流總徒四年各等語此案槐唐阿虧空倉穀內除那補斛面穀二千石應照那移律擬雜犯流總徒四年輕罪不議外其那動倉穀代補民欠捏報全完應照虛出通關律併賊以監守自盜論除于叅後已據買補穀八千四百二十四石外尚未完穀三千一百六石零照例每穀一石作銀五錢共作銀一千五百五十三兩零將槐唐阿依例擬斬監候倉書楊國臣

擬杖等因具題查倉庫錢糧關係

國帑遇有虧缺俱應徹底嚴究查明是否侵欺抑
係那移民欠各照本律核實治罪此案槐唐阿
虧空倉貯穀石除現在買補還倉穀八千四百
二十四石外尚有未完穀價銀一千五百餘兩
雖據該撫審明實係民欠未完私那備借穀石
分年墊解捏報全完並無侵盜入已情弊但細
核案情該員於乾隆十九年到任其十四五六
七八等年未完民欠俱係接徵前任未完之項

原可據實揭報何故與本任經徵未完民欠一併捏作全完後復輾轉那移彌縫掩飾其中不無侵漁入已情弊自應追詰明確務使案無疑竇照例定擬庶成信讞况例載州縣錢糧如果民欠未完捏報全完照虛出通關硃鈔律以監守自盜論係指實欠在民而言與侵盜入已者有別故例內又有情願一年限內代民全完者准其復還原職等語可知侵盜錢糧入已者不得牽引此例明矣今槻唐阿虧空倉貯穀石如

果侵漁屬實自應照侵盜本例問擬斬候不必
復援民欠未完捏報全完之例若果積欠在民
該員並未侵盜入已則那移倉貯捏報全完俱
有本條應得罪名亦不便以民欠作爲官侵轉
致情罪未協應令該撫徹底根究將各戶所欠
錢糧分年按數逐細詳查是否的係民欠或係
該員侵漁入已并現在欠戶出具認還甘結有
無抑勒承認之處秉公推鞫取具確實供詞按
例妥擬具題到日再議等因題駁去後續據該

撫疏稱覆訊槐唐阿供稱乾隆十四五七八等年民欠未完銀米穀石實因節年奏銷案內已經開叅議處是以不復揭報後因催提兵餉緊迫恐罹叅處遂將倉穀先後那動糶賣碾米分別墊解並將前任民欠同本任經徵未完民欠俱各捏報全完正在設法賠補卽被叅究委無侵漁入已情弊查乾隆十四年至二十二年各戶未完銀米以及二十並二十一二年民借未完倉糧前委寧武府知府薄岱赴托克托

城另查實徵紅簿委係實欠在民并據接任通
判福慶具有認徵印結現在托克托城居住之
欠戶具有認欠愿完結狀在案今又行據現任
通判富勒琿分年按數逐細詳查俱係實欠在
民據訊各該欠戶僉稱並無勒認情弊且現據
各欠戶陸續交納已完穀二千餘石其非侵盜
捏作民欠亦無勒認別情實屬確鑿無疑查此
案槐唐阿原虧倉穀一萬三千五百三十石零
除該叅員先自買還穀八千四百餘石今又買

交那補斛面穀二千石共完穀一萬四百二十四石又據各欠戶現在陸續完交穀二千一百一十六石八斗零僅未完穀九百九十石零以每穀一石折銀五錢計算共銀四百九十五兩零將槐唐阿依那移例總徒四年未完穀石勒限一年果能全完另行照例辦理等因具

題前來查例載那移庫銀五千兩以下者仍照律擬雜犯流總徒四年等語今槐唐阿虧空倉穀據該撫疏稱實係積欠在民並無侵漁入已情

弊且已陸續完穀一萬四百二十餘石又據各
欠戶完交穀二千一百一十六石現在未完穀
價銀四百九十五兩零正與那移庫銀數在五
千兩以下之例相符應如該撫所題槐唐阿合
依那移庫銀五千兩以下例擬雜犯流總徒四
年係旗人解部枷責發落其未完穀價銀兩已
據該撫將伊任所資財封貯造報其在京家產
亦經咨旗查辦應令該撫速飭變抵還項該撫
既稱該管倉書楊國臣不行稟阻應照不應重

馬文采

卷三 駁依那移

律杖八十折責三十板革役等語應如該撫所
題完結等因乾隆二十六年十月初三日題初
五日奉

旨依議明山趙孫英明德俱着于現任內罰俸一年
永泰着銷去紀錄二次免其罰俸欽此